



種痘要覽



種痘要覽凡例

一種痘一法實足補造化雖權輿有宋而前此未聞有窮其始者獨朱玉堂定論一書頗能溯其原委余于壬申之春曾節錄其論及諸方保痘之有驗者編成小帙名曰保痘須知茲因痘疹告成因思此法于近世所不可缺爰增入他書中之論種者數則改名種痘要覽庶幾于痘科中無偏廢云

一痘疹慈航云近今痘方多宗黃西邱其書自始至終皆以順逆險而立爲三圖說其謂順者不必治其謂險者當用保元湯加減治之猶近理也獨謂

逆者不可治徒治無益是教人袖手待斃矣何不
仁之甚也夫此爲俗醫圖利圖名立說則可若爲
仁人濟世濟民而論不幾大謬乎卽一班所論上
中下三症亦不免猶蹈此弊惟心法亦甚駁其不
良卽定論亦宗心法論治就險症中頗有治愈明
驗此正吾心所謂求其生而不得死者與我均無
憾耳聶朱二子何得吾心所同然乎

種痘要覽卷首目錄

正心誠意論

慈幼筏一則

種師與醫生不可偏廢

滌穢免痘湯

蘇油擦法

綠奴占春丸

種痘原始

詳考種痘法

續補種痘法

種痘精神形氣論

選苗有二不用

痘母

紙撚照法

玉顏膏

避穢氣

雜事禁忌

偶犯解法

防痘入眼



利症要覽
目錄

歸茸湯
附回陽酒

月經觸變

麝觸癢

客忤觸變

諸獸驚搐
附烏龍散

巫醫並論

痘疹慈航一則

馮氏錦囊一則

治疹新案

藥物宜辨

鹿茸宜備
附方二

論桑虫灌漿



北京中医药大学图书馆藏

種痘要覽卷首

正心誠意論

大學聖經有云欲正其心者先誠其意又云意誠而后心正今之人上天之所以不默佑者良由意不誠而心不正也予今日告戒後學如欲學種痘關係匪輕必須克去己私復還天理忠君愛民孝親敬長恤寡憐孤敬老慈幼教子孫以義方待族鄰以仁恕見色不迷不欺臨財毋貪毋苟如此者可學種痘倘於此告戒之言或有缺一天報隨之自謂可以奪天工造化誰知頃刻之間痘症忽焉告變非由出痘者命



皆天折或因種痘者學問之不精德行之有虧意不誠而心不正也予年七十有七十種十全百不失一用是以告後學

慈幼筏一則

世有神痘家其實在能定嬰兒稟賦出痘不死然後種之百無一失間有壞事者偏屬富貴之子蓋非不能灼見未免貪利心切卽不可種而意圖僥倖遂至失手此則醫之過也夫

種師與醫生不可偏廢

節錄慈航原序

張京鏞曰丙寅孟冬余閑居端州邸中有以種痘之



術自楚中來者余叩其說將信將疑會有侈談曾爲
其子姪種痘者皆不藥而愈可萬萬保無虞余思是
疾爲兒童所不免而有一術焉可使出于萬全父母
之心能不爲之前席而請也因以三兒一女禱之于
神而付托之按法布種至期而發其善者顆粒朗然
紅潤可愛竊喜其術之果驗也不意五兒其痘獨異
有粒無漿漸成黑陷彼徒知種痘而不知醫理餌其
藥不應幸余友謝君館于余家囑余急用慈航法索
劑服之然後奏效

濟時按種痘一術自有耑門在兒科家往往卑之

不道但近今種師亦有自謂兼能醫者究其學不
過熟讀金鏡錄耳其中虛實寒熱之理茫乎未解
烏可信任是以種師與醫生二者不可偏廢也

滌穢免痘湯

大尹王天中傳
自上方異人

十月經霜後取棟樹子一升收貯到正月初一日半
夜子時父母止令一人知將棟子入鍋煮湯待溫洗
兒全身永不出痘

蘇油擦法

凡遇種苗可于先數旬
日行之至下苗卽止

用蘇油于每夜臨臥時以手中三指蘸油擦兒頭額
項背腰兩手腕兩足腕然後睡卽可以使輕亦暢達



流通升脫凝滯之義

綠奴占春丸

凡欲種痘之兒必先預製此丸一面蒜油擦法二面
餌以此丸如甫週歲及未週歲之兒不能服者亦可
製作錠子磨灌其方內所加綠萼梅蕊愈多愈妙且
此物多採陰乾與小兒平日常服大可益智聰明解
除胎毒悅美顏色也

生甘草

去皮甲已
年為君土

黃芩

乙庚年
為君金

黃蘗

丙辛年
為君水

山梔

丁壬年
為君木

眞川連

戊癸年
為君火

山豆根

佐

連翹殼

佐

牛蒡子

佐酒淘
炒另研



先視其年所屬者爲君次四味爲臣君藥倍用臣藥減半佐視臣又減半加入綠萼梅含蕊不拘多少爲使去蒂風乾烘燥于冬至日或擇天醫月德合吉日灑掃淨宇先將五味分五行排香案供禱更將本兒八字呈供齋主虔叩禮禱者爲誦諸誥畢然后取藥逐件磨末另取眞臘雪水煮升麻汁卽將八字焚于汁內攪勻或打糊或水法爲丸粗細隨便漂辰砂爲衣竹葉煎湯下

此本韓氏醫通所載五瘟丹方故以五運爲主萬密齋選入痘疹心法爲預解痘毒第一方改名爲代天

宣化丸壬申春日諸同人咸以兒女種痘之事任余
且囑配合預解丸方因思痘有耑司本難越組第同
人諄囑不禁動余保赤之婆心爰取是方增入綠萼
梅蕊更名之曰綠奴占春丸非敢剽竊前人亦以廣
人後嗣

按萬氏代天宣化丸有二方此係痘疹心法所載
又在片玉痘疹所載用人中黃而不用甘草且除
八味外又加荆芥防風苦參蘇葉四味爲佐冬至
日取臘雪水煮升麻加竹瀝糊神麴爲丸用辰砂
雄黃爲衣故此方如有法製人中黃大可代出甘

草更妙或欲製作錠子不妨照片玉所載加竹瀝
糊神麴爲之至於加味爲衣不必依此○大率下
苗前旬日卽用油擦服丹起其丹每一歲約服三
錢如十歲之兒合丹三兩每日早晚各一錢五分
先算定分兩然後分君臣配准其神麴須煮如漿
糊爲妙○夫痘毒藏于命門未經觸發如火在石
原何預解之有然此非論于將種之時也蓋種痘
者未病要其必病已病要其無病苟不先解其蘊
蓄之邪潤其關竅之路則壅遏灼爍助痘爲虐者
正恐不少是以先旬日而用此者並非爲消除解

脫之計乃以之清宮除道云爾

種痘原始

定論載宋仁宗時有丞相王旦初生諸子俱苦于痘後老年生一兒名素招集諸幼科而告之曰汝等俱明于治痘否乎咸應之曰不敢言明于治痘但畧知治痘之法也王旦曰能知之卽能明之也每年予各以金相贈俟小兒出痘衆皆請來共相認症用方調治俟結痂還元之後再厚贈酬謝幸母吝教推諉時有四川人做京官者聞其求醫治痘乃請見而陳說種痘之有神醫治痘之有妙方十可十全百不失一



王旦聞之喜相問曰此神醫是何姓名何處居住汝
既知之爲我請來彼應之曰此醫非男子乃女人也
傳說生身於江南徐州之地自幼戒絕葷酒長不婚
嫁亦不披剃雲游至四川峨眉山頂蓋茅庵而居焉
時有上橋中橋下橋三處女人之好善者悉皆皈依
後此現身說法自出痘症至一十二日回水結痂乃
命三橋女人曰此痘痂可種也一歲之兒女可用此
痂三十粒於淨磁鍾內以柳木作杵研爲細末用潔
淨棉花些須又用潔淨之水春秋溫用夏則涼用冬
月畧帶熱須滴三五點于鍾內乾則又加幾點總以

杵勻不乾捏成棗核樣以紅絲線拴定約有寸許則
翦去其線納于男左女右之鼻孔內線露在外以防
吸上未滿一歲之兒種六箇時辰取出若二三歲之
兒種十箇時辰取出卽滿十二時亦可此痂春秋二
季卽一箇月之痂可種若夏五六月半箇月或二十
日者亦可種若冬月嚴寒四五十日者亦可種蓋以
寒則氣聚熱則氣散故時日有不同耳至下苗取出
後約計五日而五臟傳變至七日身必發熱發熱三
日苗必現焉見苗三日而齊出齊出之後痘必次第
長漿漿長三日而各充足旣曰漿足則回水結痂之

候也以發熱三日應天時春三月發生之時也見苗
出齊應夏三月長養之時也長漿足漿應秋三月成
熟之時也回水結痂應冬三月收藏之時也若未出
齊以及灌漿未足不妨多一日以象閏月此在人神
而明之也汝等依予之法將自己兒女種之十可十
全百不失一遂如法種之皆各全愈自是環峩眉山
之東西南北無不求其種痘若有神明保護人皆稱
爲神醫所種之痘稱爲神痘若丞相必欲與公郎種
痘某當雇人夫肩輿卽往峩眉山敦請此神醫亦不
難也不踰兩月敬請神醫到汴京見王素摩其頂曰